

Na osnovu člana 16. stav 1. Zakona o Vladi Zeničko-dobojskog kantona - Prečišćeni tekst- ("Službene novine Zeničko-dobojskog kantona", broj: 7/10), člana 96. Zakona o inspekcijama Zeničko-dobojskog kantona ("Službene novine Zeničko-dobojskog kantona", broj: 6/11) i člana 31. Zakona o prekršajima („Službene novine FBiH“, broj: 63/14) na prijedlog direktora Kantonalne uprave za inspekcijske poslove, Vlada Zeničko-dobojskog kantona na 17. sjednici održanoj dana 10.07.2015. godine, d o n o s i

U R E D B U

o postupku čuvanja, smještaja i načinu postupanja sa privremeno oduzetim predmetom prekršaja

DIO PRVI - OSNOVNE ODREDBE

Član 1. (Predmet)

Ovom Uredbom uređuje se:

- a) postupak čuvanja i smještaja privremeno oduzetog predmeta prekršaja, koji je od pravnog ili fizičkog lica privremeno oduzeo ovlašteni inspektor Kantonalne uprave za inspekcijske poslove Zeničko-dobojskog kantona (u daljem tekstu: Uprava) i
- b) postupak prodaje, uništenja ili doniranja predmeta prekršaja iz stava (1) ovog člana, prije okončanja postupka od strane nadležnog suda i nakon okončanja istog.

Član 2. (Pojmovi korišteni u Uredbi)

Pojedini pojmovi upotrebljeni u ovoj Uredbi, imaju slijedeće značenje:

- a) **predmet prekršaja** - predmeti, roba, proizvodi, dokumentacija, sredstva rada i drugo, koji su upotrebljeni, ili su bili namjenjeni za izvršenje prekršaja, ili koji su nastali izvršenjem prekršaja.
- b) **privremeno oduzeti predmet prekršaja** - predmet prekršaja koji je ovlašteni inspektor privremeno oduzeo i izdao potvrdu o privremenom oduzimanju,
- c) **oduzeti predmet prekršaja** - predmet prekršaja za koji je pravosnažnim rješenjem suda ili konačnim i izvršnim prekršajnim nalogom izrečena zaštitna mjera oduzimanja predmeta,
- d) **subjekt nadzora** - pravno i fizičko lice registrovano kod nadležnog organa za obavljanje određene djelatnosti ili fizičko lice koje obavlja određenu djelatnost bez rješenja nadležnog organa, nad kojim se vrši inspekcijski nadzor,
- e) **skladište** - skladišni prostor Direkcije za robne rezerve Zeničko-dobojskog kantona (u daljem tekstu: Direkcija), skladišni prostor određen od strane Uprave, skladišni prostor subjekta nadzora kod kojeg je u postupku inspekcijskog nadzora izvršeno privremeno oduzimanje predmeta prekršaja ili skladišni prostor određen od strane drugog organa koji je izvršio privremeno oduzimanje predmeta prekršaja, a nakon toga obavijestio Upravu kao nadležni organ, da izvrši postupak inspekcijskog nadzora.
- f) **način smještaja predmeta prekršaja** - prijem predmeta prekršaja u skladište sa ispravama koje prate predmet prekršaja, prijevoz od mjesta oduzimanja do mjesta skladištenja i angažovanje radnika koji vrše utovar na mjestu privremenog oduzimanja predmeta prekršaja i istovaru skladište,
- g) **način čuvanja predmeta prekršaja** - mjere i radnje koje uobičajeno vrši skladištar, u cilju očuvanja predmeta prekršaja u određenom stanju, količini, kvalitetu i vrijednosti koja je utvrđena u postupku inspekcijskog nadzora.

DIO DRUGI - NAČIN SMJEŠTAJA PRIVREMENO ODUZETOG PREDMETA PREKRŠAJA

Član 3.

(Prijevoz i čuvanje privremeno oduzetog predmeta prekršaja)

- (1) Privremeno oduzeti predmet prekršaja prevozi se pod nadzorom kantonalnog inspektora (u daljem tekstu: inspektora), od mjesta privremenog oduzimanja do mjesta skladištenja, vozilom kojim raspolaže Uprava, vozilom koje obezbijedi Služba za zajedničke poslove Zeničko-dobojskog kantona (u daljem tekstu: Služba za zajedničke poslove), vozilom kojim je vršen prevoz privremeno oduzetog predmeta prekršaja ili vozilom skladištara.
- (2) Privremeno oduzeti predmet prekršaja u prijevozu prate slijedeće isprave: zapisnik o inspekcijskom nadzoru i potvrda o privremenom oduzimanju predmeta prekršaja.
- (3) Ako skladišni prostor Direkcije ne ispunjava uslove za smještaj privremeno oduzetog predmeta prekršaja, a Uprava ne raspolaže skladišnim prostorom, inspektor će subjektu nadzora od kojeg je privremeno oduzet predmet prekršaja, zapisnikom naložiti da isti uskladišti u svom skladišnom prostoru.
- (4) Subjekt nadzora iz stava (3) ovog člana dužan je privremeno oduzeti predmet prekršaja čuvati i sa istim postupati s pažnjom dobrog domaćina, na način propisan ovom Uredbom i odgovoran je za nastalu štetu na predmetu prekršaja.

Član 4.

(Obaveze subjekta nadzora od kojeg je privremeno oduzet predmet prekršaja zatečen u prijevozu)

- (1) Subjekt nadzora od kojeg je privremeno oduzet predmet prekršaja koji je zatečen u prijevozu, dužan je izvršiti prijevoz do mjesta skladištenja, te sa istim postupati u skladu sa odredbom člana 10. ove Uredbe.
- (2) Prijevoz predmeta prekršaja do mjesta skladištenja subjekt nadzora iz stava (1) ovog člana, dužan je izvršiti prijevoznim sredstvom koje ispunjava uslove u skladu sa važećim propisima za prijevoz istog.
- (3) Ako subjekt nadzora iz stava (1) ovog člana, ne osigura vozilo koje ispunjava uslove iz stava (2) ovog člana, odgovoran je za nastalu štetu na predmetu prekršaja.

Član 5.

(Skladištenje privremeno oduzetog predmeta prekršaja zatečenog u prijevozu)

- (1) Privremeno oduzeti predmet prekršaja iz člana 4. ove Uredbe, subjekt nadzora izuzetno može uskladištiti u najbližem mjestu od mjesta gdje je predmet prekršaja privremeno oduzet, kod drugog skladištara koji raspolaže sa skladišnim prostorom koji ispunjava propisane uslove.
- (2) Troškove skladištenja iz stava (1) ovog člana, snosi subjekt nadzora od kojeg je oduzet predmet prekršaja.
- (3) Vlasnik skladišnog prostora dužan je sa predmetom prekršaja preuzetim na čuvanje, postupati u skladu sa članom 3. stav (4) ove Uredbe.

Član 6.

(Potvrda i evidencija o privremeno oduzetom predmetu prekršaja)

- (1) Inspektor je dužan sačiniti potvrdu o privremenom oduzimanju predmeta prekršaja u četiri primjerka, od kojih po jedan primjerak uručuje subjektu nadzora, skladištaru i višem referentu za izvršenje koji vodi evidenciju o privremeno oduzetim predmetima prekršaja iz stava (3) ovog člana.
- (2) Potvrda iz stava (1) ovog člana sadrži: naziv organa, datum, vrijeme i mjesto oduzimanja predmeta prekršaja, podatke o subjektu nadzora, vrstu, količinu, stanje predmeta prekršaja i podatak o deklarisanjoj ili procijenjenoj vrijednosti predmeta prekršaja.
- (3) Uprava je dužna voditi posebnu evidenciju o privremeno oduzetim predmetima prekršaja, u elektronskoj formi.
- (4) Evidenciju iz stava (3) ovog člana vodi viši referent za izvršenje (u daljem tekstu: viši referent).

- (5) Potvrda o privremenom oduzimanju predmeta prekršaja iz stava (2) ovog člana (Aneks broj 1) i obrazac elektronske evidencije o privremeno oduzetim predmetima prekršaja iz stava (3) ovog člana (Aneks broj 2) su sastavni dio ove Uredbe.
- (6) Inspektor može angažovati vještaka radi vršenja procjene vrijednosti privremeno oduzetog predmeta prekršaja. Troškove vještačenja snosi subjekt nadzora.

Član 7.

(Skladište za smještaj privremeno oduzetog predmeta prekršaja)

- (1) Privremeno oduzeti predmet prekršaja smješta se u odgovarajuće skladište.
- (2) Odgovarajuće skladište je skladište koje ispunjava uslove u zavisnosti od vrste privremeno oduzetog predmeta prekršaja, kao i odgovarajući objekti i prostori za smještaj specifične vrste robe (u daljem tekstu: skladište) kao što su:
 - a) rezervoar - za smještaj nafte i naftnih derivata;
 - b) stovarište za smještaj građevinskog materijala i druge robe;
 - c) garaža, parking prostor ili drugi prostor podoban za smještaj motornih i drugih vozila;
 - d) hladnjača;
 - e) drugi odgovarajući objekat ili prostor za smještaj privremeno oduzetog predmeta prekršaja specifične vrste koji zahtijeva posebne uslove smještaja i čuvanja.

Član 8.

(Postupak izbora skladištara)

Izbor skladištara vrši se putem Službe za zajedničke poslove, a međusobni odnosi između izabranog skladištara i Službe za zajedničke poslove uređuju se ugovorom.

Član 9.

(Prijem privremeno oduzetog predmeta prekršaja u skladište)

- (1) Prijem privremeno oduzetog predmeta prekršaja u skladište vrši skladištar.
- (2) Skladištar izdaje skladišnu prijemnicu ili zapisnik o vrsti, količini i drugim svojstvima primljenog predmeta prekršaja, koji obavezno sadrži i popis isprava predatih uz predmet prekršaja koje čine sastavni dio skladišne prijemnice ili zapisnika.
- (3) Skladištar je dužan jedan primjerak skladišne prijemnice ili zapisnika iz stava (2) ovog člana uručiti inspektoru.

DIO TREĆI - NAČIN ČUVANJA PRIVREMENO ODUZETOG PREDMETA PREKRŠAJA

Član 10.

(Obaveze skladištara)

- (1) Skladištar koji primi privremeno oduzeti predmet prekršaja na čuvanje poduzima odgovarajuće radnje i mjere u skladu sa propisima, radi očuvanja predmeta prekršaja u stanju, količini i kvalitetu u kojem se nalazio u momentu predaje skladištaru.
- (2) Skladištar je dužan voditi evidenciju o privremeno oduzetom predmetu prekršaja koji je primio na čuvanje.
- (3) Evidentiranje iz stava (2) ovog člana vrši se na način kojim se obezbeđuje precizna identifikacija vrste, količine, svojstava, karakteristika i fizičkog stanja robe (nova roba, upotrebljavana, vidljivi nedostaci na robi ili ambalaži).

Član 11.

(Rok čuvanja privremeno oduzetog predmeta prekršaja)

Skladištar je dužan privremeno oduzeti predmet prekršaja čuvati do okončanja postupka prodaje, uništenja, doniranja ili vraćanja u skladu sa ovom Uredbom.

DIO ČETVRTI - NAČIN I POSTUPAK RASPOLAGANJA SA PRIVREMENO ODUZETIM PREDMETOM PREKRŠAJA

Član 12. (Komisija)

- (1) Vlada Zeničko-dobojskog kantona na prijedlog Uprave rješenjem imenuje Komisiju za postupanje sa privremeno i trajno oduzetim predmetom prekršaja (u daljem tekstu: Komisija).
- (2) Komisija iz stava (1) ovog člana se sastoji od 3 (tri) člana koje predlažu: Kantonalna uprava za inspekcijske poslove, Direkcija za robne rezerve i Ministarstvo za rad i socijalnu politiku i izbjeglice (u daljem tekstu: Ministarstvo).
- (3) Komisija iz stava (1) ovog člana dužna je postupati u skladu sa ovom Uredbom.

Član 13.

(Prodaja privremeno oduzetog predmeta prekršaja prije okončanja prekršajnog postupka)

- (1) Prije okončanja prekršajnog postupka, inspektor je dužan donijeti rješenje kojim će odrediti prodaju predmeta prekršaja putem Komisije:
 - a) ako je privremeno oduzeti predmet prekršaja podložen brzom kvarenju,
 - b) ako bi njegovo čuvanje imalo nesrazmjerne troškove,
 - c) ako ne postoje odgovarajući uslovi za skladištenje, zbog kojih može doći do propadanja privremeno oduzetog predmeta prekršaja ili gubljenja neke osobine bitne za kvalitet.
- (2) Protiv rješenja iz stava (1) ovog člana, može se izjaviti žalba, koja ne odlaže izvršenje rješenja.
- (3) Rješenje iz stava (1) ovog člana, inspektor je dužan dostaviti i nadležnom sudu.

Član 14.

(Uništenje privremeno oduzetog predmeta prekršaja prije okončanja prekršajnog postupka)

- (1) Prije okončanja prekršajnog postupka, inspektor je dužan donijeti rješenje kojim će naložiti uništenje privremeno oduzetog predmeta prekršaja putem Komisije:
 - a) kada je robi istekao rok upotrebe,
 - b) kada je roba iz drugih razloga izgubila prometnu ili upotrebnu vrijednost.
- (2) Protiv rješenja iz stava (1) ovog člana, može se izjaviti žalba, koja ne odlaže izvršenje rješenja.
- (3) Rješenje iz stava (1) ovog člana, inspektor je dužan dostaviti i nadležnom sudu.
- (4) Komisija je dužna izvršiti uništenje privremeno oduzetog predmeta prekršaja, u prisustvu inspektora i sačiniti zapisnik o uništenju, a po jedan primjerak zapisnika uručiti inspektoru i višem referentu.

Član 15.

(Vraćanje privremeno oduzetog predmeta prekršaja po okončanju sudskog postupka)

- (1) Kada je pravosnažnim rješenjem suda naloženo vraćanje privremeno oduzetog predmeta prekršaja, inspektor je dužan skladištaru dostaviti pismenu obavijest zajedno sa rješenjem suda, kojom ga obavještava da je sudski postupak okončan i da je dužan subjekt nadzora vratiti predmet prekršaja.
- (2) Skladištar je dužan u roku od tri dana od dana prijema obavijesti inspektora iz stava (1) ovog člana, obavijestiti subjekt nadzora o mjestu i vremenu preuzimanja predmeta prekršaja, uz napomenu da skladištar ne snosi odgovornost za nastalu štetu, ukoliko subjekt nadzora ne izvrši preuzimanje predmeta prekršaja u ostavljenom roku.

Član 16.

(Uništenje oduzetog predmeta prekršaja po okončanju sudskog postupka)

- (1) Kada je pravosnažnim rješenjem suda izrečena zaštitna mjera oduzimanja predmeta, inspektor je dužan rješenjem odrediti uništenje oduzetog predmeta u sljedećim slučajevima:
 - a) kada je robi zabranjen promet,
 - b) kada je robi istekao rok upotrebe,
 - c) kada je roba iz drugih razloga izgubila prometnu ili upotrebnu vrijednost.

- (2) Rješenjem iz prethodnog stava, inspektor je dužan odrediti način na koji će Komisija izvršiti uništenje oduzetog predmeta u skladu sa posebnim propisom.
- (3) Ako nije propisan način uništenja oduzetog predmeta, inspektor će naložiti da Komisija izvrši uništenje oduzetog predmeta na prikladan način.
- (4) Protiv rješenja iz stava (1) ovog člana ne može se izjaviti žalba.
- (5) Komisija je dužna izvršiti uništenje oduzetog predmeta, u prisustvu inspektora i sačiniti zapisnik o uništenju, a jedan primjerak zapisnika uručiti inspektor i višem referentu.

Član 17.

(Prodaja oduzetog predmeta prekršaja po okončanju sudskog postupka)

- (1) Kada je pravosnažnim rješenjem suda izrečena zaštitna mjera oduzimanja predmeta, inspektor je dužan rješenjem odrediti prodaju oduzetog predmeta putem Komisije.
- (2) Protiv rješenja iz stava (1) ovog člana, ne može se izjaviti žalba.
- (3) Prodaju oduzetog predmeta Komisija vrši putem komisionara, sa kojim je Direkcija za robne rezerve Zeničko-dobojskog kantona zaključila ugovor.
- (4) Komisija je dužna nakon prodaje oduzetog predmeta po jedan primjerak zapisnika uručiti inspektor i višem referentu.

Član 18.

(Doniranje oduzetog predmeta prekršaja u humanitarne svrhe)

- (1) Odluku o doniranju oduzetog predmeta u humanitarne svrhe, na prijedlog Komisije, donosi Ministarstvo, u slučaju bezuspješne prodaje iz člana 13. i 17. ove Uredbe.
- (2) Distribuciju oduzetog predmeta iz stava (1) ovog člana vrši Komisija, na osnovu Odluke iz stava (1) ovog člana, o čemu sačinjava zapisnik.
- (3) Komisija je dužna nakon doniranja oduzetog predmeta po jedan primjerak zapisnika uručiti inspektor i višem referentu.

Član 19.

(Prihodi od izvršene prodaje predmeta prekršaja)

Prihodi od izvršene prodaje predmeta prekršaja, umanjeni za troškove transporta, skladištenja i druge nastale troškove, u skladu sa zakonom koji uređuje pripadnost javnih prihoda i odredbama Pravilnika o načinu uplate javnih prihoda budžeta i vanbudžetskih fondova na teritoriji Federacije Bosne i Hercegovine koji je na pravnoj snazi u vrijeme prodaje predmeta prekršaja, pripadaju Budžetu Federacije Bosne i Hercegovine

DIO PETI - PRIJELAZNE I ZAVRŠNE ODREDBE

Član 20.

(Prijelazne odredbe)

Postupci koji do dana stupanja na snagu ovog propisa nisu pravosnažno okončani završit će se po odredbama propisa koji je bio na snazi u vrijeme donošenja.

Član 21.

(Prestanak važenja Odluke)

Danom stupanja na pravnu snagu ove Uredbe prestaje da važi Odluka o postupanju sa privremeno i trajno oduzetom robom broj: 02-29-6093/03 od 21.03.2003. godine i Odluka o izmjeni i dopuni Odluke o postupanju sa privremeno i trajno oduzetom robom broj: 02-29-24238/03 od 05.11.2003. godine.

Član 22.

(Stupanje na snagu i primjena Uredbe)

Ova Uredba stupa na snagu osmog dana od dana objavljivanja u “Službenim novinama Zeničko-dobojskog kantona”.

Broj: 02-_____/15.

Datum, 10.07.2015. godine

Zenica

PREMIJER

Miralem Galijašević

DOSTAVLJENO:

1x Kantonalna uprava za inspekcijske poslove,

1x „Službene novine Zeničko-dobojskog kantona“,

1x a/a.



Broj: _____
Zenica _____

Kantonalni _____ inspektor, postupajući po službenoj dužnosti, u postupku
inspeksijskog nadzora _____,
(naziv subjekta nadzora)

na osnovu člana 80. stav (2) Zakona o inspekcijama Zeničko-dobojskog kantona ("Sl. novine Zeničko-dobojskog kantona", broj: 6/11) i člana 6. stav (1) i (2) Uredbe o postupku čuvanja, smještaja i načinu postupanja sa privremeno oduzetim predmetom prekršaja ("Sl. novine Zeničko-dobojskog kantona", broj: _____) i z d a j e :

P O T V R D U

O PRIVREMENOM ODUZIMANJU PREDMETA PREKRŠAJA

1. _____
2. _____
3. _____
4. _____
5. _____
6. _____
7. _____

Kantonalni _____ inspektor

(Potpis)

Dostavljeno:

- 1 x Subjekt nadzora,
- 1 x Skladištar,
- 1 x Viši referent za izvršenje,
- 1 x spis



Bosna i Hercegovina, Zenica, ul. Kučukovići br. 2.
Tel: 032/460-800, 032/460-801, Fax: 032/460-802
e-mail: kuzip@zdk.ba

ANEKS BROJ 2.

Redni broj	Subjekt nadzora	Inspektor	Broj i datum zapisnika i potvrde o privremenom oduzimanju predmeta prekršaja	Datum, vrijeme i mjesto privremenog oduzimanja predmeta prekršaja	Vrsta, količina i vrijednost privremeno oduzetog predmeta prekršaja	Vlasnik vozila kojim je izvršen prijevoz privremeno oduzetog predmeta prekršaja	Mjesto skladištenja (skladištar) privremeno oduzetog predmeta prekršaja	Broj i datum skladišne prijemnice ili zapisnika o prijemu	Broj i datum rješenja o prodaji predmeta prekršaja prije, odnosno po okončanju sudskog postupka	Broj i datum rješenja o uništenju predmeta prekršaja prije, odnosno po okončanju sudskog postupka	Broj i datum obavijesti skladištaru o vraćanju predmeta prekršaja po okončanju sudskog postupka	Broj i datum zapisnika Komisije o prodaji, uništenju, doniranju ili vraćanju predmeta prekršaja prije, odnosno po okončanju sudskog postupka
1.	2.	3.	4.	5.	6.	7.	8.	9.	10.	11.	12.	13.
1.												
2.												
3.												
4.												
5.												
6.												
7.												
8.												
9.												
10.												
11.												
12.												